

## 每週經課朗誦經文 ( 巴克禮漢羅/教羅 ) 2011/10/30

### 共同經課-1 約書亞記三章七節~十七節

7 耶和華對約書亞講：Tùi 今 á 日起，我 beh hō你 tī 以色列眾人 ê 目矚前做大，hō in 知我 kap 你 tī-teh，親像前 kap 摩西 tī-teh 一樣。8 你 tiòh 吩咐扛約櫃 ê 祭司講：Lín 到約旦水邊 ê 時，tiòh 停腳 tī 約旦。9 約書亞對以色列人講：Lín 近前來，聽耶和華 lín 上帝 ê 話。10 約書亞 koh 講：Tùi án-ni，lín thang 知活 ê 上帝 tī lín 中間，beh tī lín ê 頭前趕逐迦南人，Hek 人、Hi-bī 人、Pi-lī-sé 人、Kek-ka-sat 人、A-mô-lī 人、Iâ-pò-su 人。11 看 ah，普天下 ê 主宰 ê 約櫃 beh tī lín ê 頭前過去，入約旦。12 Lín ta<sup>n</sup> tiòh tùi 以色列支派中揀十二人，每支派一個人；13 到扛普天下 ê 主耶和華 ê 約櫃 ê 祭司，in ê 腳 khiā tī 約旦河 ê 水，約旦河 ê 水，就是 tùi 頂面流落來 ê 水，beh 截斷，khiā 起來 kui 堆。14 百姓離開布棚，beh 過約旦 ê 時，祭司就扛約櫃 tī 百姓 ê 頭前。15 Tī 收成 ê 時，約旦 ê 水常常 poā<sup>n</sup> 過伊 ê 岸。扛約櫃 ê 到約旦，扛約櫃 ê 祭司，16 腳一下 ùn-tiòh 水，hit-ê tùi 頂面流落來 ê 水，就 khiā 起來 kui 堆，相離真遠，tī Sat-láh-tàn 邊頭 ê 亞當城；hit-ê 流 tī A-láh-pa 海，就是鹽海，hiah-ê 水全然截斷；百姓就 tī 耶利哥 ê 對面過去。17 扛耶和華約櫃 ê 祭司 tī 約旦 ê 乾地定定 khiā-teh；以色列眾人 lóng tùi 乾地過去，直到百姓一盡過約旦。

### 共同經課-2 詩篇一百零七篇一節~七節，三十三節~三十七節

1 Lín tiòh 感謝耶和華，因為伊是好，因為伊 ê 慈愛永永 tī-teh。2 耶和華所救贖 ê tiòh 講這話，就是伊 tùi 對敵手中所救贖 ê；3 Tùi tak 國，tùi 東 tùi 西，tùi 南 tùi pak，所聚集 ê lóng tiòh án-ni 講。4 In tī 曠野拋荒 ê 路漂流，Chhē 無城 thang khiā 起。5 也 iau，也嘴乾，In ê 心神暈去。6 In 就 tī 苦難中哀求耶和華；伊 tùi in ê 患難中拯救 in。7 Koh chhoā in 行直 ê 路，Hō in 去到 thang khiā 起 ê 城。33 伊 hō 江河變做曠野，Hō 水泉變做乾燥 ê 地。34 伊 hō 肥地變鹹 ê 地，Lóng 是因為 khiā 起 tī-hia ê 人 ê 罪惡。35 伊 hō 曠野變做潭堀，Hō 乾地變做水泉。36 伊 hō iau 餓 ê 人 tiàm tī-hia，Hō in 能起造 thang khiā 起 ê 城；37 Koh 種作田園，栽葡萄，得 tiòh 所出 ê 土產。

### 共同經課-3 帖撒羅尼迦前書二章九節~十三節

9 兄弟 ah，lín 記得阮 ê tiòh 磨 kap 艱苦，ài 免得拖累 lín 一人，就暝日做工，來傳上帝 ê 福音 hō lín。10 Lín 做干證，上帝也做干證，阮對 lín 信 ê 人，做人是怎樣聖潔、公義，無 thang 嫌；11 親像 lín 知阮怎樣款待 lín tak 人，親像老父款待家己 ê kiá<sup>n</sup> 兒，有勸勉 lín，也安慰，也干證；12 是 beh hō lín 行 t'ai-chì 合 tī 上帝，就是召 lín 入伊 ê 國 kap 榮光 ê。13 所以阮也感謝上帝無 soah，因為 lín tùi 阮承受所聽上帝 ê 道理 ê 時，lín 接納伊，無掠做人 ê 道理，就是掠做上帝 ê 道理，(實在真正是)，這就是出力行 tī lín 信 ê 人 ê 中間。

### 共同經課-4 馬太福音二十三章一節~十二節

1 Hit 時耶穌 kā 眾人 kap 伊 ê 學生講，2 經學士 kap 法利賽人坐摩西 ê 位。3 所以見若 in 所 kā lín 講 ê，lóng tiòh 行來守伊；總是莫得照 in ê 所做來行；因為 in 有講，也無行。4 In 用重 koh oh 擔 ê 擔縛來 hē tī 人 ê 肩頭頂，若是 in 家己 m̄ 肯用一支指頭 á 振動伊。5 In 一切 ê 所做，lóng 是 beh hō 人看 chiah 做；因為 in ê 背肩(poē-keng)做 khah 闊，衫 á 裾 ê 鬚做 khah 長。6 Ài 筵桌裡坐大位，會堂內坐高位，7 街市裡 hō 人請安，也 hō 人稱呼 in 拉比。8 若是 lín 莫得 hō 人稱做拉比；因為 lín ê 先生是一個，lín lóng 是兄弟。9 Tī 地裡也莫得稱人做父；因為 lín ê 父是一個，就是 tī 天裡 ê。10 也莫得 hō 人稱做先生；因為 lín ê 先生是一個，就是基督。11 若是 lín 中間做大 ê，beh 做 lín ê 差用。12 凡若自高 ê，beh hō 伊卑微；家己卑微 ê，beh 高升伊。